

«MOTTAKERNAVN»
«KONTAKT»
«ADRESSE»
«POSTNR» «POSTSTED»

2006/125 - 3846/2007

«REF»

Johnny Heggstad, 51 96 38 31

16.10.2007

Helse2020 - Strategi for helseregionen, vedtak og oppfølging

Prosjekt HELSE2020 leverte pr. 1.april 2007 sitt forslag til revidering av strategi for helseregionen, og dette vart lagt fram for styret i Helse Vest RHF i styremøtet 11.april 2007. Styra i dei enkelte føretaka har også jamleg vore informerte om framdrift og innhald i prosjektet og har behandla strategien i eigne styremøte. Styret i Helse Vest RHF sende forslaget ut på ei brei høyring både til interne og eksterne interessentar i løpet av våren og forsommaren. Innspela har vore handsama og vurderte og styret har no gjort endeleg vedtak om strategien fram mot år 2020.

Strategi for helseregionen vart handsama av styret for Helse Vest RHF i styremøte 03.oktober 2007 (sak 081/07 B). Styret gjorde slikt vedtak:

1. Styret i Helse Vest RHF vedtek "HELSE2020 – Strategi for helseregionen" slik den no ligg føre med dei føreslåtte endringane frå høyringa.
2. Den vedtekne planen skal
 - a. Gi retning for utviklinga fram mot 2020
 - b. Legge grunnlaget for prioriterte tiltak dei neste fire åra
 - c. Vere styrande for ei årleg oppdatering av tiltak og prosjektportefølje som vert vedtekne i styringsdokument og budsjett for HFa.
3. Gjennomføring skal skje i nær og god samhandling med eigne føretak og med dei eksterne aktørane.
4. Helse 2020 er ein strategiplan for heile helseregion Vest, og legg føringar for utvikling av pasienttilbodet innan spesialisthelsetenesta i regionen. Det er difor grunnleggjande at visjonen, verdigrunnlaget og dei overordna målsettingane vert felles for heile føretaksgruppa og erstattar det som finst av lokale overordna målformuleringar.
5. Kvart helseføretak har ansvar for at strategidokumentet og kortversjonen (visjon, verdigrunnlag og målsettingar) blir gjort kjent i organisasjonen. Visjon, verdigrunnlag og målsettingar ligg fast for heile føretaksgruppa og dannar grunnlag for dei vidare prosessane i kvart helseføretak."

Strategiprosessen

Gjennom arbeidet med HELSE2020 har ein vist at helsesektoren står overfor ei rad krevjande utfordringar i eit 2020-perspektiv. Samtidig representerer ny kunnskap, teknologi og metode spennande moglegheiter. Skal ein lukkast med å møte desse, må dette skje på ein planmessig og heilskapleg måte der samanhengar vert avdekka og får si praktiske løysing. Så vel utfordringane som moglegheitene krev ei samordna tilnærming der ein koordinerer sin innsats, tydeleggjer sine ulike rollar og deler kunnskap mest mogleg effektivt.

Strategi for helseregionen, versjon 1.3, er oppdatert med forslag til endringar/tillegg etter innspela i høyringa og slik det er vedteke av styret. Det har vore brei støtte til visjonen, verdiane og målformuleringane i dokumentet. Det har vidare vore god tilslutning til tiltaka og konstruktive innspel til forbetringar og presiseringar. Fleire uttrykkjer også at planen er overordna i si utforming og ønskjer aktiv deltaking i det vidare arbeidet med detaljering og gjennomføring.

Iverksetting og oppfølging

Strategidokumentet inneheld mekanismar for korleis prosjekt og tiltak skal gjennomførast og følgjast opp på ein god måte. For å sikre gjennomføringa vil tiltaka i strategidokumentet også verte tekne inn i dei årlege rutineane som ein viktig del av budsjettprosessen og med forankring i styringsdokumenta ut til HFa.

Planverket legg opp til ein større grad av samhandling og at det vert stilt både menneskelege og økonomiske ressursar på alle nivå i gjennomføringa av tiltaka. Vidare vil strategidokumentet danne grunnlaget for utarbeiding av lokale strategiplanar i HFa. Det er her viktig å merke seg at styret seier at visjonen, verdigrunnlaget og dei overordna målsettingane vert felles for heile føretaksgruppa og erstattar det som finst av lokale overordna målformuleringar.

Kommunikasjonen i samband med HELSE2020 har gjennom alle fasar av prosjektet vore tufta på ein grundig og omfattande kommunikasjonsstrategi. Dette gjeld både forankring, innsamling av idear og synspunkt og bruk av storsamlingar. Når strategien no er vedteken, er det framleis viktig med god og grundig kommunikasjon for å forankre innhaldet i HFa. Kvart helseføretak har eit sjølvstendig ansvar for å arbeide vidare med strategiplanen slik at dei overordna måla blir realiserte og må difor lage ein plan for korleis dei skal sikre at HELSE2020 blir gjort kjend og tilgjengeleg for alle i føretaket.

Helse Vest vil trykke den endelege strategiplanen og distribuere denne til HFa. I tillegg blir det laga ein kortversjon som inneheld den felles visjonen, verdigrunnlaget og dei felles målsettingane. Helseføretaka må gjere dette materiellet tilgjengeleg internt. Helse Vest ser til at eksterne samarbeidspartar får materiellet tilsendt.

Vi ber om at dette brevet også vert lagt fram for dei respektive HF-styra.

Med vennleg helsing

Helge Bryne
Viseadministrerende direktør

Johnny Heggstad
Prosjektdirektør